

Fasnacht 2020



dr Hampe vo Kleihünige

Im Fall...

... do motz i, schimpf i, schrei i, flenn i, rüef i us und fluech i
Vom Dreischpitz bis ans Eglisee uff dr Parkplatzsuechi
Do findi ein, legal, do droht mr nit e mol e Buess
Doch woni wött parkiere, mergg i: Shit, ich bi jo z Fuess

... mi liebi Frau, die teschtet neuerdings bi mir mi Treui
Si postet mir als «Uschi» heissi Tweeds, si sei die Neu
Natürlig gib ich Antwort, so vil Aaschtand find ich wichtig
Und jetz isch mini Alti uff sich sälber iifersüchtig

... e Lädeli und näbedra e Schtroossebeiz mit Flair
Zwölf Bänggli zum Verwiile und e Shop und e Coiffeur
E Boutique und zäh Bäum, was zwüschenin drei Schpünte git
Do wüsse mir schpontan: d Freie Schtrooss ischs sicher nit

... jetz gits e Bar in Basel, do zahlsch an dr Bar nüm bar
Zahlsch nur no mit Karte, bargäldlos, das isch jo klar
Ob Bargäld oder bargäldlos, was juggd mi das scho gross
Ich bi noch jedem Barbsuech sowiso mi Bargäld los

... mir hän e neu Wohnig gfunde, ich und mini Frau
D Rüm sin glei und dungeg, d Kuchiwand sin schimmelgrau
D Mieti isch sautüür und d Nochber göhnis voll uff d Niere
Dasch egal, mir könne gratis vor em Huus parkiere

... ich ha e neu Fründin, e Lehrerin us Lause
Ich ha si gfrog, was hesch am liebschte, und do seit si: Pause

... du sehsch mi zahle, zahle, zahle, zahle ohni Änd
Ich zahl und zahl und zahl und zahl sit Johre Alimänt
Ich bi e tolle Babbe für mi Nochkomme-Sextett
Hejo, ha gluegt, ass jedes Kind si eige Mamme het

... ich dängg no vil an FCB. I dängg au an si Trainer
Und s wunderschöne Fuessballmärl, das wird als wie schöner
Dä Super-Trainer, isch für s Team die beschti Medizin
Drum freu mi über jede Siig vo Union Berlin

... s isch super, ich ha ghört, mir heige ändlig gnüegend Gäld
Zum alli grosse Schwirigkeite z löse uff dr Wält
Ab hüt isch Schluss mit Hunger, Not und Krieg an alle Fronte
S Gäld isch do (s ligt eifach nur no uff de falsche Konte)

... i fahr nit z Bärg, ich mues mi nit uf Alpegißel wuchte
Es gheie jo bim Klättere scho gnuag bärgab in d Schluchte
Ich bi nit gmacht für d Alpewält, do miecht ich numme schlapp
I schtürz jo scho bim Schpalebärg regelmässig ab

... ich ha e neu Fründin, s isch d Svenja vo Zwinge
Und liideschaftlig ghörsch si schtundelang und täglich singe
Und wenn si singt, do sehsch mi dusse uff em Balkon sctoh
I will jo schliesslig nit, ass eine meint, ich wurd se schloo

... sgit Lüt, die läbe läbenslänglich ohni Alkohol
Die hän denn ohni Kohl so quasi sälte ein im Gool
Doch ohni Alkohol, jo schriibet euch das hinter d Ohre
Wär e Teil vo euch do inne gar nit erscht gebore

Wotsch au by uns bänggle?
Uff www.vsg-basel.ch erfahrsch meh!

